

太上洞玄靈寶赤書玉訣妙經卷下

元始上帝 靈寶尊神 十方大聖 妙行真人 常以一年三詣南帝洞
陽宮 校定天元 推數劫會 開明赤書五老真文 封題玉磧以付五
帝 元始五炁常以雞鳴上會靈寶玉京玄都上宮 陽光初明 散元始
之暉 流觀諸天 其氣鬱鬱 其暉熏熏 精如月珠 光如紫雲 五
氣運轉 如車之輪 上御九天之闕 中固五帝靈山 下注學士五牙
之根 上宮眾聖大智真人皆以其時餐食其暉 仰咽其精 與天相承
致得無窮 太上道君請注其文 以傳至真 依靈寶玄科 四萬劫
一傳 如是靈寶明見 出法度人 十方大聖尊神 妙行真人 同會
南圃丹霍之阿三元洞室 封題玉磧 眾真侍座 香華伎樂 五千萬
眾 真文奕奕 光明洞達 五氣觀暉 照映內外 雲景秀朗 如星
中之月 奇相眾好 不可勝量
是時 北室有精進賢者王福度 有女名曰阿丘曾 厥年十六
時在浴室中 浴香湯自洗 見金光明曲照 疑有不常 出宇登墻
南向望見道真 神精煒燦 容景煥日 女意歡喜 叉手作禮 遙稱
名丘曾 今遭幸會 身覲天尊 歸身十方天中之天 願賜禁戒

太上洞玄靈寶赤書玉訣妙經 卷下

清微藏書閣

遵承法文 拔諸惡根 早得轉輪 改為男形 萬劫之後 冀得飛仙
五帝魔王見女發心大願 恐過我界 因化作五帝老人 往告女
曰 我受十方尊神使命 來語女靈寶法典 吾道方行 法使仁愛
慈孝為本 始聞汝父當出女身 已受人言 不可得違 宜先從之
人道既備 禮訓亦足 餘可投身 天監爾心 汝不從父 仙無由度
女答魔曰 我前生不幸 宿無因緣 功德未充 致作女身 晨
夕悔念 誓守一心 用意堅固 出於自然 生由父母 命歸十天
誠違父教 不如君言 魔見女執心秉直 不可得干 於是便退 丘
曾自云 道既高邈 無緣得暢 仍聚柴登墻 焚燒我身 冀我形骸
得成飛塵 隨風自降 往至道前 於是火然 丘曾叉手向天言
十方無極天尊 今日歸形骸天中之天 願得時暢 如之散塵 便投
身火中 憤爾無著 身如蹈空 俄頃之間 已見女身化成男子 徑
至道前 於是受誡 元始即命南極尊神為女之師 授女真文 給太
華玉女 金晨玉童各三百人 眾好佩發三十二相 洞映女身
道告南極尊神 此女前生已奉靈寶 轉輪萬劫 今得化生人中
見吾出法 即得化形 當更度人九萬九千 乃得至真大神 是時

十方是男是女 皆發正真道意 莫不精心持齋奉戒 修承靈寶
頂有至願 皆得度世

道告阿丘曾曰 南極尊神 昔往亦為女子 生於禪黎世界 赤明
天中 大作功德 諸天所稱 道業未成 乃值火劫 數交 天地易位
其在棄蕩之例 南上感其丹至 朱宮書其紫名 化其形骸於元君
之胞 一劫乃生 得為男身 於南丹洞陽上館明珠七色寶林 師赤
帝梵寶昌陽丹靈真老君 赤書道成 位登南極 汝前生與南極同在
禪黎世界 於丹陽柏林舍下同發道意 爾時 南極姓皇 字度明
執汝右手 俱題赤石 記姓名南宮 即書汝筆跡 題於南軒 今猶
尚在 石字亦存 汝憶之否 丘曾心悟 降目見南極所住南壁刻書
太甲歲七月一日 皇度明 阿丘曾同於丹陽柏林舍下發願 合二
十三字 字甚分明 憶此未久 忽經天地三易劫運 今乃得生靈寶
之世

道語丘曾 爾今得師南極 豈不高乎 皆由爾身宿緣所致 當
勤加上業 廣度天人 功滿德備 自當令爾位及至真 超凌三清
迅足九霞 朝宴太玄也 丘曾稽首道前 丘曾先身有幸 得生道世

太上洞玄靈寶赤書玉訣妙經 卷下

清微藏書閣

獲遇天真 曲逮幽室 光應臯形 神啟壇內 心應形外 投骸歸
命 萬希一全 高上玄鑒 轉度我身 既得化形 侍對天尊 復蒙
南極 得訓師宗 喜懼之懷 靡知所陳 惟垂成就 明所未聞 玉
訣寶妙 願特哀矜

太上道君登命赤帝靈童 開九霜玉笈七色之蘊 出靈寶赤書玉
訣二卷 以付南極 使依盟授受丘曾 眾仙監盟 一時稱善

元始赤書服食青牙導引九炁青天玉訣

元始赤書五篇真文 生於太空之中 天地未光 開闢未明 潛
結元根 三景成立 五氣行焉 五色分彩 煥照五方 置以五帝
導以陰陽 輪轉九天之紐 運明五星之光 殖地五嶽以安鎮 澳人
五府以養神 是以至真之人常依陽光之始明 上導九天之和氣 下
引玉泉之流芳 致元精於太極 招五帝於靈童 溉之者不衰 存之
者無窮 迴萬劫而更始 保五牙於顏容 實靈寶之妙訣 恢萬聖之
宗也

修養青牙導引東方九炁青天之法 當以立春之日 雞鳴入室
東向九拜 平坐叩齒九通 思東方安寶華林青靈始老君 姓爛 諱

朝餐朱景 玉芝滿充 迴停劫年 朽骸反童
長齡天地 水享無窮 身生水火 變化百方
畢 引赤炁三咽止 便服南方赤書玉文一十二字

靈符

右十二字 則三炁丹天之名 導引赤帝三炁 服食丹牙 皆赤
書白紙上 存思訖而頓服之 則引赤炁而充溢 芳芝玄注於絳宮
赤帝降真於存思 受赤文於靈童 保丹牙以永固 養三炁於祝融
策赤圭以通靈 運五篇以召神 長齋感於太寂 上天書名於南窗
可謂坐致而不難 永享而無窮也 當以雞鳴陽光始分 南向叩齒三
通 摩兩掌令熱 以摩試面目三過 仰咒曰
南方朱丹 服食朱丹 飲以丹池
畢 以舌撩下齒之表 舐唇嗽口 令玉芝滿口而三咽之 又引
赤炁三咽 令鎮心宮之中 其道畢也
元始赤書服食戊己導引元炁黃天玉訣
修養黃牙導引戊己十二炁黃天之法 當以春分 夏節 秋分

太上洞玄靈寶赤書玉訣妙經 卷下

清微藏書閣

冬節四日 雞鳴入室 向王十二拜 平坐叩齒十二通 思中央玉寶
元靈元老君 姓通班 諱元氏 字含樞紐 形長一尺二寸 頭冠黃
精玉冠 衣五色黃羽飛衣 駕乘黃龍玉輿 建黃旗 從神戊己僮老
之官十二萬人 從十二炁黃天中下來降室內 須臾化生黃炁 勃勃
如景雲之吐暉 灌覆己形 從口中而入 直下脾府 又思土星煥明
中天 光照我身 皆使分明 竟 便開目仰咒曰

中黃嵩山 元炁徘徊 上有元老 總統四垂
參駕黃龍 五色羽衣 運導九天 轉輪璇璣
煥明土星 流光散暉 玉英芳芝 充溢四肢
陶灌我身 脾府鮮開 養牙餐精 萬神總歸
檢魂制魄 仙鍊八威 表裏洞明 長生不衰
通真達靈 昇入太微
畢 引黃炁十二咽止 便服中央赤書玉文一十六字

靈符

右十六字 則中央黃天之名 導引黃帝十二炁 服食黃牙 皆

赤書白紙上 存思訖 頓而服之 則上引元炁於九天 下注玄膺於妙門 太倉氣糧而自充 脾府不澳而自熏 黃老應響以玄和 靈童披襟而告文 黃素運走 給命東西 妙哉玉訣 為萬仙之端 當以雞鳴陽光始分 向王叩齒十二通 摩兩掌令熱 以摩拭面目十二過 咒曰

中央戊己 昂昂太山 服食精炁 飲以醴泉 畢 以舌撩舌上玄膺 取玉泉 舐唇三過 咽之 又引黃炁一

十二咽 令鎮脾府之中 其道畢也

元始赤書服食素牙導引七炁素天玉訣

修養素牙導引七炁素天之法 當以立秋之日 雞鳴入室 西向七拜畢 平坐叩齒七通 思西方七寶金門皓靈皇老君 姓上金 諱昌開 字曜魄寶 形長七寸 頭冠白精玉冠 衣白羽飛衣 駕乘白龍玉輿 建素旗 從神庚辛胡老之官七十萬人 從七炁素天中下來 降室內 須臾化生白炁 皓皓如秋雲之羅天 灌覆己形 從口中而入 直下肺府 又思金星煥明 西方光照我身 皆使分明 竟 便開目仰咒曰

太上洞玄靈寶赤書玉訣妙經 卷下

清微藏書閣

七靈七門	皓映西華	中有素皇	元始之家
參駕白龍	七炁峨峨	徘徊玉門	散精朱霞
金星吐暉	芳芝滂沱	玄澳我身	養我素牙
明石鮮光	萬劫不殂	服以流泉	餐以太和
九天上帝	給以玉華	保年駐顏	白景敷羅
長存天地	三光同遐		

畢 引白炁七咽止 便服西方赤書玉文一十二字

西 引 白 炁 七 咽 止 便 服 西 方 赤 書 玉 文 一 十 二 字

右十二字 則西方七炁素天之名 導引白帝七炁 服食素牙 皆赤書白紙上 存思訖 頓而服之 則七炁天神玄注素暉 灌溉明石 自生玉芝 肺宮開明而納真 太倉不哺而自熏 素靈應響而驅策 參承九天之門 餐之不休 壽與元始同年 當以雞鳴陽之始分 向西叩齒七通 摩兩掌令熱 以摩拭面目七過 仰咒曰 西方明石 服食明石 飲以靈液 舐唇漱口 令玉芝滿口 便三咽之 又引白

自無此挺 終不得盼篇目 舊科四百年一出傳

當以雞鳴安身定神 以次行事 先服東方青牙炁 次南方

中央 次西方 次北方 如常法五帝 畢 便叩齒三十六通 咽炁

二十五過止 又都咒曰

白石巖巖 行源湧泉 洞以玉漿 飲之長生

壽命益長

畢 以舌撩口上下中央 令玉芝滿口而三三咽 又引炁二十五

過 極炁而咽之 其道都畢也

元始五老存思五嶽五帝招靈求仙玉訣

凡修靈寶五篇真文 思神念仙 諸所求欲 時聞九天真人詣房

身得神仙 當以立春後甲寅 乙卯日沐浴清齋 平旦入室 東向

九拜 平坐叩齒九通 關啟身神 畢 閉眼思東嶽泰山青帝君 姓

玄丘 諱目陸 形長九寸九分 頭戴青玉通天寶冠 衣青羽飛衣

駕乘青龍 從青腰玉女十二人 從東方來降兆室 良久 青帝君化

為嬰兒始生之狀 在青炁之中 隨炁從兆口入 徑至肝中 思心生

赤炁 以灌繞肝府 青赤二炁混沌相著 如慶雲之沓煙 覺肝中熏

太上洞玄靈寶赤書玉訣妙經 卷下

清微藏書閣

熱 便九咽 仰咒曰

東天九門 中有始皇 出入三清 邀宴華房

安鎮靈嶽 役運句芒 上繞青霞 九千萬重

參駕羽輦 十二飛龍 左侍青腰 右衛神童

把執簡籍 青札玉文 校定仙名 列言上宮

今日王吉 請陳所言 身佩赤書 名參帝堂

願神願仙 青錄簿中 上迴靈駕 來降我房

二炁混合 化形嬰蒙 安治肝府 招致華光

靈暉流灌 面生金容 坐致自然 神明交通

身得長生 天地無窮

畢 引青炁九咽止

行此道九年 則東嶽靈官青帝降真 致青腰玉女九人 為兆通

達 上聞九天 生死父母 罪書責役 配屬東嶽 則神明更相囑付

滅除罪名 自得解脫 昇上福堂 此法妙重 生死津梁

當以立夏後丙午 丁巳之日 沐浴清齋 正中入室 南向三拜

平坐叩齒三通 關啟身神 畢 閉目思南嶽霍山赤帝君 姓爛

諱洋光 形長三寸三分 頭戴赤玉通天寶冠 衣丹羽飛衣 駕乘赤龍 從赤圭玉女十二人 從南方來降兆室 良久 赤帝君化為嬰兒 始生之狀 在赤炁之中 隨炁從兆口入 徑至心中 思脾生黃炁以灌繞心宮 黃赤二炁混沌相著 如炎火之爛光 覺心中熏熱 便三咽 仰咒曰

丹天三炁 南上玉門 中有大神 赤帝靈君
衣丹帶符 飛文羽裙 駕乘赤龍 玉輿絳雲
南霍靈山 萬神高尊 出入三清 上宴九玄
赤圭侍役 玉童衛真 把執簡錄 絳簿玉文
校定仙品 輕重上聞 今日大王 靈嶽開仙
上迴萬神 降我三門 變化嬰兒 鎮心安魂
混合二炁 纏我命根 長與祝融 駕乘景雲
逍遙南阿 天地長存
畢 引赤炁三咽止
行此道三年 則南嶽霍山靈官 赤帝降真 致赤圭玉女三人為兆驅使 通致啟願 萬求皆從 生死父母 罪書刑責 配屬南嶽

太上洞玄靈寶赤書玉訣妙經 卷下

清微藏書閣

皆得解除 刑名釋散 昇上天宮 其法妙重 生死開通也

當以春分 夏節 秋分 冬節後戊辰 戊戌 己丑 己未之日

沐浴清齋 日映入室 向王十二拜 平坐叩齒十二通 關啟身神

畢 閉眼思中嶽嵩山黃帝君 姓角 諱普生 形長一尺二寸 頭

戴黃玉通天寶冠 衣黃羽飛衣 駕乘黃龍 從黃素玉女十二人 從

中嶽來降兆室 良久 黃帝君化為嬰兒始生之狀 在黃炁之中 隨

炁從兆口入 徑至脾府 思脾生白炁 灌繞脾宮 黃白二炁混沌相

著 似黃雲之迴天 覺脾中熏熱 便十二咽 仰咒曰

中天黃元 總統四靈 戊己中山 元始上精

黃帝大神 參駕飛軒 十二黃龍 上宴三清

玉女侍衛 神童使令 開山出圖 校仙定名

徘徊中嶽 日王敷靈 回真曲降 流灌我形

混元變化 老帝成嬰 鎮安黃宮 府藏華榮

身有奇毛 內外光明 真人交接 通達九清

得參黃輶 飛昇玉庭

畢 引黃炁十二咽止

行此道十二年 則中嶽靈官五帝降房 致黃素玉女十二人 為
兆通達關啟 上聞九天 生死父母 罪書刑名 係於中嶽 皆得解
散 滅絕罪書 上名仙錄 去離地官 昇入福堂 生死開泰 度人
無量也

當以立秋後庚申 辛酉之日 晡時沐浴 清齋入室 向西七拜
平坐叩齒七通 關啟身神 畢 閉眼思西嶽華山白帝君 姓浩丘
諱元倉 形長七寸七分 頭戴素玉通天寶冠 衣素羽飛衣 駕乘
白龍 從白素玉女十二人 從西嶽來降兆室 良久 白帝君化為嬰
兒始生之狀 在白炁之中 隨炁入兆口中 徑至肺府 思腎生黑
炁以灌繞肺宮 白黑二炁混沌相著 似慶雲之沓霄 覺肺中熏熱
便七咽 仰咒曰

七炁之天 素皇金堂 白帝大神 安鎮西方
華陰靈山 號曰神王 白羽飛裙 建旗御龍
上遊玄清 出入華宮 總領仙籍 列簡諸方
吉日嘉辰 萬聖宴降 徘徊九霞 流散暉光
金精煥煥 白石洋洋 開仙觀靈 神敷四鄉

太上洞玄靈寶赤書玉訣妙經 卷下

清微藏書閣

願道願仙 願生願長 上願既會 靡不吉昌
薄收通真 改我形容 變化自成 與炁同翔
身飛骨輕 上昇紫房

畢 引白炁七咽止
行此道七年 則西嶽靈官白帝降真 致白素玉女七人 為兆通
靈關啟 所求皆聞九天 生死父母 罪書刑名 係於西嶽 咸得解
脫 罪書自除 名上仙籍 去離五道 永昇福堂 生死開度 福慶
自然也

當以立冬後壬子 癸亥之日 子時沐浴 清齋入室 北向五拜
平坐叩齒五通 關啟身神 畢 閉眼思北嶽恆山黑帝君 姓伏
諱通萌 形長五寸五分 頭戴玄玉通天寶冠 衣玄羽飛衣 駕乘黑
龍 從太玄玉女十二人 從北嶽來降兆室 良久 黑帝君化為嬰兒始
生之狀 在黑炁之中 隨炁入兆口中 徑至腎府 思肝生青黑 以
灌繞腎府 青黑二炁混沌相著 如碧雲之沓煙 覺腎中熏熱 便五
咽 仰咒曰

五炁玄天 上始精流 結炁凝靈 號曰仙廬

安鎮北恒 黑帝所遊 遨宴北單 參龍駕浮
今日王吉 萬靈開圖 五炁徘徊 慶雲四敷
仙童執簡 太玄度符 記我仙籍 金錄上書
迴真曲降 混合嬰孩 二炁交絡 洞灌我軀
玄冥攜提 神仙為儔 永享天地 萬劫無休
畢 引黑炁五咽止

行此道五年 則北嶽靈官黑帝降真 致太玄玉女五人 給已使
令 通致啟乞 上聞九天 生死父母 罪名刑書 係屬北嶽 並蒙
解除 得度三惡之道 上昇天堂 大妙上法 普度無窮也

行此道 常當夷心靜思 意注分明 靈真易感 得其法式不移
年年而覩神行出入之向方 而天官司迎 魔靈消伏 不敢干前
心聰慧 自審吉凶 五嶽五帝常為友賓 神明交通 立致神仙

元始靈寶五帝醮祭招真玉訣

道言 靈寶赤書五篇真文 篇鎮一方 皆元始自然之書 五老
以五帝侍衛五方 靈官掌錄 禁限一年三開 眾仙慶真 玄科舊典
上宮諸真人及五嶽神仙 三年一奉靈寶五帝靈官 鴻鷺之鳥 香

太上洞玄靈寶赤書玉訣妙經 卷下

清微藏書閣

酒甘果 上獻天真 以存靈炁 後學常能爾者 則靈寶五帝感乎精
神 五方靈官當之喜欣 凡禮無濃薄 意從中來 苟有至誠 人神
感焉 故書其品式 祕而修行
舊典降致靈寶五帝靈官法 以春用甲寅 乙卯 夏用丁巳 丙
午 四季用戊辰 戊戌 己未 己丑 秋用庚申 辛酉 冬用癸亥
壬子 建王之日 於靈嶽作高壇 四方簡纂 東西南北王上 開
五門 安五牒 牒言如左

東方牒青書言

九炁青天安寶華林青靈始老蒼帝君 九炁天君 太上真王 青
腰玉女 東鄉諸靈官 青華元陽門 安東面門

南方牒赤書言

三炁丹天梵寶昌陽丹靈真老赤帝君 朱丹三炁天君 元氣丈人
朱宮太丹玉女 南鄉諸靈官 洞陽太光門 安南面門

中央牒黃書言

元洞太帝之山玉寶元靈元老黃帝君 太帝真人 子丹黃庭戊己
天倉玉女 中黃太帝官君 元黃高晨門 安王上門左

西方榜白書言

七炁之天七寶金門皓靈皇老白帝君 明石七炁大夫 太上白素玉女 西鄉諸靈官 通陰金闕門 安西面門

北方榜黑書言

五炁玄天洞陰朔單鬱絕五靈玄老黑帝君 玄滋五炁天君 太上靈君 夜光玉女 北鄉諸靈官 陰生廣靈門 安北面門

眾真榜紫書言

九天眾靈五嶽靈山真人 江河四瀆三官九府諸靈官地仙 玉女 五嶽飛仙神仙諸仙官君 詣元黃高晨門右 安王上門右 右五門 法玄都上宮五氣之門 上仙眾真非正方之門出入 皆從中央黃帝門右也

安五門畢 當四面安障 勿令當風 使火光氣亂 每令火氣密 勿廣照 使靈氣散也 敷一五尺盛席 隨節安之 春則向東方也 鴻鷺鳥一頭 令熟 香酒五斗 每令清香 果隨豐珍之宜 用盛杯十一枚 杓令新好 拌三枚 皆令精 其二拌各請五杯 其一拌請一杯 一杯拌令在五杯拌者下 流五香火 相次於拌前 果亦

太上洞玄靈寶赤書玉訣妙經 卷下

清微藏書閣

三拌 如之 餘酒肉別器 請著座前 列南和丹繒五尺絳紋繒也於案上 請靈寶五篇真文及五符 割碧林之帛五尺 青紋繒也 以覆真文符上 安著座後 令符處丹青中 以為落髮歃血之盟也 青以代髮 丹以代歃血之誓 真人不傷神損德 故以代之 香令五種 雜和之香 爐每令新好 相連安之 束帶跪請 每令餘聲下氣 天真密感而降 當朱書白銀木刺上 六枚 以請五帝眾仙靈官 安五香火之下 東方九炁青天安寶華林青靈始老青帝君 青牙九炁天君 太上真王 青腰玉女 東鄉諸靈官 某帝真人某甲再拜五香 稽首奉請 降青華元陽門 南方三炁丹天梵寶昌陽丹靈真老赤帝君 朱丹三炁天君 元氣丈人 朱宮太丹玉女 南鄉諸靈官 某帝真人某甲再拜五香 稽首奉請 降洞陽太光門 中央元洞太帝之山玉寶元靈元老黃帝君 太帝真人 子丹黃庭戊己 天倉玉女 中黃太帝官君 某帝真人某甲再拜五香 稽首奉請 降元黃高晨門左

西方七炁之天七寶金門皓靈皇老白帝君 明石七炁大夫 太上白素玉女 西鄉諸靈官 某帝真人某甲再拜五香 稽首奉請

降通陰金闕門

北方五炁玄天洞陰朔單鬱絕五靈玄老黑帝君 玄滋五炁天君 太上靈君 夜光玉女 北鄉諸靈官 某帝真人某甲再拜五香 稽首奉請

降陰生廣靈門

九天眾靈五嶽靈山真人 江河四瀆三官九府諸靈官地仙玉女 五嶽飛仙神仙諸仙官君 某帝真人某甲再拜五香 稽首奉請

降元黃高晨門右

右朱書五簡 安五香火下 讀簡畢 便請一帝 再拜 下簡 以次如法 後一簡令在中央之右 送天官都畢 埋山五方 此玄都舊典 不得移式 則天真不降 誤兆被殃也

安簡畢 調聲自陳 某年某月某朔某日某子 某處某帝真人甲乙 年如干歲 以某年某月某日 從某嶽真人甲乙奉受太上靈寶五老真文自然赤書五篇符命 謹依大道玄都舊典科法 清齋沐浴 香熏神室 奉請五帝君 五帝靈官真人 神仙玉女 謹以鴻鷺之鳥

太上洞玄靈寶赤書玉訣妙經 卷下

清微藏書閣

香酒甘果 表於丹心 潔整身神 司迎上皇天尊 請遣五體真官
三魂七魄 三宮真人 上到九天 奉迎九天之宮 三天之宮 五外
之鄉 青牙之天 朱丹之天 太帝之山 中黃之天 明石之天 玄
滋之天 八方五帝真人之庭 通宣所啟 執齋奉禮 虛心注仰 願
迴靈駕 暫降某處 臨映丹誠 降五符之真 歆享微禮薄饌

重請上神

奉降東方靈威仰蒼帝君 青牙九炁天君 太上真王 青腰玉女 東鄉諸靈官

次讀南方簡如上法

奉降南方赤飄弩赤帝君 朱丹三炁天君 元炁丈人 朱宮太丹玉女 南鄉諸靈官

次讀中央簡如上法

奉降中央含樞紐黃帝君 太帝真人 子丹黃庭戊己天倉玉女 中央太帝官君

次讀西方簡如上法

奉降西方曜魄寶白帝君 明石七炁大夫 太上白素玉女 西鄉諸靈
官 次讀北方簡如上法
奉降北方隱侯局黑帝君 玄滋五炁天君 太上靈君 夜光玉女 北
鄉諸靈官

次讀眾靈簡如上法

奉降九天眾靈 五嶽靈山真人 江河四瀆三官九府諸靈官地仙玉女
五嶽飛仙神仙諸仙官君

右請五帝眾真六位 位輒再拜 合十二拜 迎帝稱降事
畢 送帝 當稱上勞某帝 輒再拜 又合十一一拜 醮禮之道
畢於此矣

奉請天真畢 五過上酒燔香 而自陳啟 某以有幸 宿世因緣
九天之劫 轉及某身 遭遇明運 道法流行 得以穢身 參染靈
文五篇赤書五符寶經 自叨竊以來 尊仰上真 心希神仙 而精誠
淺薄 未能感靈 常恐罪身沉頓囂穢 淪沒九泉 天慈廣大 展某
效心 守誠信向 長齋思神 念善修生 志度無窮 而精誠淺狹
未能自宣 靈文探奧 天尊遐邈 未敢自聞 今上吉良日 整身清

太上洞玄靈寶赤書玉訣妙經 卷下

清微藏書閣

齋 告祭五靈五老五帝 諸君丈人 上勞神光 至真天尊 曲降卑
賤 誠慚誠懼 不敢自寧 不勝天光 遐照無細 緣茲上陳 某承
先師舊典 以丹青告誓 閉口奉修 不敢泄漏 五八乃宣 以定仙
契 五帝關聞 乞真符經圖 神靈侍衛 營護某身 登山涉嶺 出
入林磧 所求所向 皆得如心 金石開通 神明交接 萬願咸從
採芝採藥 不得隱藏 山精伏匿 萬試不干 虎狼毒螫 令不加身
玉女神童 給使東西 五帝靈炁 降入某形 安鎮五府 內外聰
明 心開意聖 逆知吉凶 三尸消滅 九蠱不生 身有奇毛 早得
神仙 惟蒙至尊大帝直垂慈恩 下流眾庶 賜如所陳 不勝洪澤
輒身效勤 臣誠惶誠恐 稽首再拜
又三過上酒 伏地 若私有所陳 自適意啟乞
啟願畢 上勞

東方靈威仰青帝 青牙九炁天君 太上真王 青腰玉女 東鄉諸靈
官 各還神房 便散香再拜
次上勞

南方赤飄弩赤帝君 朱丹三炁天君 元炁丈人 朱宮太丹玉女 南

鄉諸靈官 各還神房 便散香再拜

次上勞

中央含樞紐黃帝君 太帝真人 子丹黃庭戊己天倉玉女 中黃太帝
官君 各還神房 便散香再拜

次上勞

西方曜魄寶白帝君 明石七炁大夫 太上白素玉女 西鄉諸靈官
各還神房 便散香再拜

次上勞

北方隱侯局黑帝君 玄滋五炁天君 太上靈君 夜光玉女 北鄉諸
靈官 各還神房 便散香再拜

次上勞

九天眾靈 五嶽靈山人真人 江河四瀆三官九府諸靈官地仙玉女
五嶽飛仙神仙諸仙官君 各還神房 便散香再拜

奉禮醮祭法事都畢 取簡 隨方埋著五門下眾真簡埋於中央門

右三年一醮 九年三醮 都止

玄都傳度靈寶五篇真文符經玉訣儀式

太上洞玄靈寶赤書玉訣妙經 卷下

清微藏書閣

靈寶洞玄某嶽先生臣某甲 稽首再拜 死罪頓首 上言元始五

老上帝至真大聖尊神玉陛下 臣素下世 生值因緣 九天之劫 輪

轉不滅 宿慶福祚 延流今身 得生法門 上帝領籍 名係皇篇

身帶靈策 上清金書三洞寶經紫文丹章 五帝赤書靈寶洞玄五篇真

文 先師某嶽先生某君 奉受佩身 上真營衛 役炁驅神 施行正

道 由來蒙恩 災消禍卻 家國安寧 效驗既加 明道宜傳 臣昔

以某年某月某日登某山嶽 告誓九天 約四十年有合仙之人 骨相

應圖依科以傳 臣受法以來 年限已充 今有上學某嶽真人某甲

本命某生 年如干歲 某月生 命屬東斗 名係泰山 青嶽領籍

氣骨合真 已受上法九天靈文 所參淺狹 未見道原 不測天根

五帝不監 九天未聞 信向丹苦 祈請積載 披心告誓 感悟人神

某今齎金錢二萬四千 以質二十四生氣 上金九兩 上誓九天

五帝紋繒各四十尺 以請五老上真 金錢非赤縣所有 請以雜珍准

當充限 投誠啟告 七祖同盟 生死質虛 誓為身寶 九天上法

不敢宣泄 有違玄科 身死謝責 生死父母同役鬼官 吞聲咽氣

不敢有言 臣某甲丹心翹勤好尚 宿福所鐘 得參靈文 披眇篇目

宜極道真 輒謹清齋 身登靈山 盟天度文 案如明科 付授某
身 不敢專輒 謹於太陽靈壇伏地 拜黃繒赤表一通上聞 願九天
丞相高靈尊神 曲映所奏 垂愍丹心 如蒙上御宣告 五帝五嶽天
真靈寶元始大神 拔度某家九祖父母昇入南宮 冠帶枯骨反骸生華
輪轉窮魂化生仙門 已遷之靈進位仙宮 勒甲玉名 列書九天金
格寶藏神仙錄中 請下九炁青天青牙蒼帝君 青腰玉女 東鄉諸靈
官 從甲乙官將青龍兵馬各九億萬人 一合下降入甲身中 鎮甲肝
府之宮 請下朱丹三炁天君 元炁丈人 朱宮太丹玉女 南鄉諸靈
官 從丙丁官將赤龍兵馬各三億萬人 一合下入甲身中 鎮甲心府
絳宮 請下元洞太帝之山黃帝君太帝真人 子丹黃庭天倉玉女 中
黃大帝官君諸靈官 從戊己官將黃龍兵馬各十二億萬人 一合下入
甲身中 鎮甲脾府之宮 請下七炁之天白帝君 明石七炁大夫 太
上白素玉女 西鄉諸靈官 從庚辛官將白龍兵馬各七億萬人 一合
下入甲身中 鎮甲肺府之宮 請下五炁玄天黑帝君 玄滋五炁天君
太上靈君 夜光玉女 北鄉諸靈官 從壬癸官將黑龍兵馬各五億
萬人 一合下入甲身中 鎮甲腎府之宮 請下五嶽真人兵馬 四瀆

太上洞玄靈寶赤書玉訣妙經 卷下

清微藏書閣

真人兵馬 九宮真人兵馬 神仙飛仙乘騎各九億萬人 一合下入甲
身中 分布官府 安鎮身形五藏六府 九宮三元之內 隨逐營衛
和魂檢魄 保神養精 攝炁鍊仙 骨髓凝化 血脈成真 朝服元華
五牙芝英 漱漏玉池 津液自生 內充外溢 光景徹明 項有圓像
照朗十方 遊行天下 三界司迎 五嶽四瀆 天官地神 稽首侍
送 萬靈衛真 興雲降雨 八威召龍 千變萬化 立應自然 大劫
交周 洪災四衝 身得飛行 過度天災 八難之中 千凶萬毒 莫
不消亡 滅魔攘試 殺鬼斬奸 洞覩幽明 逆察吉凶 役使天官
坐召十方神仙自至 化景鍊形 坐在立亡 飛昇上清 與九祖父母
同登九天 甲受真之後 閉口奉修 密期天真 父不告子 惟在一
身 七年已上 四十年中 有遇仙之人 當告九天聽傳 四司五帝
三官 考召甲九祖父母 對監盟言 檢行慎法 不違天靈 生死同
仙 虧違天科 中泄真文 生死父母 及得甲身 謝罪四明 風刀
萬劫 三塗五苦 不敢蒙原 甲未備參大法之前 千愆萬罪 並乞
原除 以今維新願所奏 上合表御太上洞玄靈寶元始玉皇五老帝前
特垂照省 普關萬靈 咸願甲名長為真人 三光照曜 與五炁長

存 恩惟

九天至真太上大道無極尊神 分別哀憐 伏須告報 臣某誠惶誠恐

稽首死罪 頓首再拜奏聞

臣姓屬某郡縣

無上元始太上大道洞玄靈寶五老玉帝大聖 玉陛下

太歲某月日 於某郡縣某山峰金龍驛呈

玄都舊科授上真之法 朱書黃繒上 於靈嶽傳度經法 皆三日

三夕露文 不風不飄 乃令至真 遇風皆不合授 三過被風 經表

飛翔 此人皆不合 勿傳 此天科法峻 師與弟子宜共詳慎 必合

天靈

太上洞玄靈寶赤書玉訣妙經卷下竟

天運辛卯年酉月正一天師清微弟子洪鼎堅羅大英恭錄彙編

鞠昕延複校

太上洞玄靈寶赤書玉訣妙經 卷下

清微藏書閣